

KDN teliti laporan KL bandar ke-5 bahaya dilawati

Putrajaya: Kementerian Dalam Negeri (KDN) akan meneliti laporan platform Forbes Advisor yang menyenaraikan Kuala Lumpur (KL) di kedudukan kelima sebagai bandar raya paling bahaya di Asia Tenggara untuk dilawati.

Menteri, Datuk Seri Saifuddin Nasution Ismail, berkata laporan itu bagaimanapun bertentangan dengan Indeks Keamanan Global 2024 (GPI) yang menunjukkan Malaysia di tempat ke-10 antara negara paling aman di dunia dan tersenarai sebagai negara ketiga paling aman di rantau Asia Pasifik.

“Kayu pengukur Global Peace Indeks jelas, saya belum baca kayu ukur Forbes (Advisor), saya tidak kata saya nafikan tapi belum baca, tetapi meneliti kayu ukur yang diguna pakai oleh GPI.

“Misalnya ada demonstrasi kejam yang menyebabkan kematian nyawa dan nilai persepsi terhadap penjenayah di negara ini, ada berpuluh kayu pengukur termasuk peruntukan per kapita termasuk keselamatan yang sangat komprehensif,” katanya.

Komited pastikan keamanan

Beliau berkata demikian pada sidang media selepas menghadiri Majlis Perhimpunan Bulanan Kementerian Dalam Negeri (KDN) di sini, semalam.

Forbes Advisor dalam laporannya menyenaraikan Kuala Lumpur antara bandar yang paling bahaya di Asia Tenggara untuk dilawati.

Ia berdasarkan perbandingan yang dilakukan Forbes Advisor membabitkan insurans perjalanan untuk rakyat Amerika Syarikat (AS).

Berdasarkan laporan itu, Kuala Lumpur berada pada kedudukan kelima manakala Yangon, Myanmar berada di senarai tempat pertama diikuti Manila, Filipina (tempat kedua), Jakarta, Indonesia (tempat ketiga) dan Ho Chi Minh City, Vietnam (tempat keempat).

Mengulas lanjut, Saifuddin berkata, biar apa pun analisis yang dilakukan platform terbabit, KDN dan Polis Diraja Malaysia komited memastikan keamanan serta ketenteraman awam terjamin dan menjadi tanggungjawab utama.

Dalam perkembangan berasingan, Saifuddin berkata, KDN akan mengeluarkan kenyataan dalam tempoh terdekat berhubung isu pelacuran yang dikatakan menjadi lubang di ibu negara.